

石頭魚

石頭魚狀如鰕魚隨其大小腦中有二石子如喬麥莖白如玉有好奇者多市魚之小者貯于竹器任其壞爛即淘之取其魚腦石子以為酒籌頗為脫俗

出嶺表錄異

黃臘魚

黃臘魚即江湖之橫魚頭背長鱗皆金色齒為尖雖美而毒或煎燂乾夜即有光如籠燭北人有寓南海者市此魚食之棄其頭于糞筐中夜後忽有光明近視之益恐惧以燭照之但魚頭耳去燭復明以為不祥及啓食奩窺其餘齒亦如螢光達明遍詢土人乃此魚之常也憂疑頓釋焉

出嶺表錄異

烏賊魚

烏賊舊說名河伯從事小者遇大魚輒吐墨方數尺以混身江東人或取其墨書契以脫人財物書跡如淡墨逾年字消唯空紙耳海人言昔秦王東遊棄筭于海化為此魚形如筭袋兩帶極長一說烏賊有石遇風則前一鬚下石

出西陽雜俎

橫公魚

北方荒中有石湖方千里岸深五丈餘恒水唯夏至左右五六十日解耳有橫公魚長七八尺形如鯉而赤晝在湖中夜化為人刺之不入煮之不死以烏梅二枚煮之則熟食之可止邪病

出神異經

骨雷

扶南國出鰐魚大者二三丈四足似守宮狀常生吞人扶